

‘Nfacci lu me mari

‘Nfacci lu me mari trovavu na perla.
Bianca, luccicanti cu dintra tanti canti.
N’onda cu la schiuma bedda bianca
carizzata d’un ventu di tramuntana
ti pusà nni la terra di la Sicilia mia
pi stari ‘na jurnata ‘nzemmula, iu e tia.

Lu jornu è d’oru e la notti è d’argentu.
la luna di la Sicilia cancia a mumentu.
Quannu iu e tu stritti la taliamu
è bianca, po’ gialla, po’ arancioni,
po’ diventa russa-russa ‘nfucata
pi ‘lluminari l’occhi tò ‘namurata.

Strati strati paremu maritati,
li cori nostri pàrpitanu d’amuri,
li vucchi nostri àrdinu di siti
comu si fussimu frischi zziti,
nuddu sapi ca semu amanti
cu l’ardiri di dù spasimanti.

Assittati ‘nun bar tra un caffè
e na cassatedda siciliana,
parlâmu di natri, ‘n’arridemu,
manu cu manu nni li strincemu,
cu l’occhi nni damu ‘na taliata
e sùbitu scappa quarchi vasata.

Tra tanta genti ni sintemu sulì,
latu a latu abbrazzati rinfurzamu
la passioni di ‘stu grandi amuri.
Cala la sira e ognunu è pi sè,
misi vicinu nun nni canuscemu
nun nni taliamu, nun nni videmu.

La notti d’amuri fu maggica.

2014 Giuseppe Cardella